

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

**DARIPADA : DATO' HJ. ABDUL RAHMAN BIN
HJ. MOHAMAD [LIPIS]**

TARIKH : 14.3.2016 (ISNIN)

Dato' Hj. Abdul Rahman Bin HJ. Mohamad [Lipis] minta MENTERI PERDAGANGAN DALAM NEGERI, KOPERASI DAN KEPENGGUNAAN menyatakan adakah Kementerian berhasrat untuk menambah bilangan penguatkuasa atau menurunkan kuasa kepada mana-mana agensi pusat yang lain mahupun di bawah PBT bagi memantau harga barang di kawasan setempat.

JAWAPAN:

Tuan Yang Di-Pertua,

Kementerian Perdagangan Dalam Negeri, Koperasi dan Kepenggunaan (KPDNKK) sentiasa serius dalam usaha mengawal harga barang-barang. Penguatkuasaan pencatutan melalui Akta Kawalan Harga dan Antipencatutan 2011 dilaksanakan secara menyeluruh sejak pelaksanaan GST.

Berhubungan dengan penurunan kuasa kepada Pihak Berkuasa Tempatan (PBT) bagi memantau harga, KPDNKK masih dalam perbincangan dengan Kementerian Kesejahteraan Bandar, Perumahan dan Kerajaan Tempatan (KPKT). Beberapa siri perbincangan dan mesyuarat telah diadakan dengan pihak Kementerian tersebut untuk memperinci dan menjelaskan beberapa isu perundangan yang perlu diselesaikan terlebih dahulu sebelum ianya dapat dilaksanakan.

Selain itu, KPDNKK dengan kerjasama pihak Suruhanjaya Perkhidmatan Awam (SPA) sedang dalam proses menjalankan urusan temuduga untuk mengisi sebanyak 457 kekosongan jawatan Pegawai Penguatkuasa pelbagai gred dalam masa terdekat. Semua urusan pengambilan dan pengisian jawatan tersebut dijangka akan dapat diselesaikan secepat mungkin dan apabila pengisian ini dilaksanakan sepenuhnya, jumlah keseluruhan Pegawai Penguatkuasa meningkat kepada 2669 orang.